

明詩紀事

第十一函
五十二冊



明詩紀事卷十三

貴陽陳原田輯

甲籤

袁凱

二十首

凱字景文松江華亭人洪武三年舉人薦授監察御史以病免歸有海叟集四卷

何景明大復集我朝諸名家集獨海叟詩爲長叟歌行近體法杜甫古作不盡是要其取法亦必自漢魏以來者其所造就蓋具體而未大耳陸深金臺紀聞國初高季迪與袁海叟皆以詩名而雲間與姑蘇近殊不聞其還往唱酬若不相識然何也都元敬嘗道季迪有贈景文詩曰清新還似我雄健不如他今其集不載是詩元敬得之史鑑明古史得之朱應祥岐鳳岐鳳吾松人以詩自豪於一時爲序在野集者其事雖無考然兩言者蓋實錄云國雅袁侍御景文才情道拔往往有奇語尤閑于詠

物其題白燕聞笛頗為時口膾炙
香祖筆記明初詩人共推高季迪為冠而大復獨以
海叟為冠空同許為知言今讀其詩古詩學魏晉近
體學杜皆具體而微耳遽躋之青邱生之列未免失
倫
明詩別裁李獻吉謂海叟師法子美何仲默謂歌行
得杜之體鄙意傷於平直未極變化若七言斷句在
李庶子劉賓客間青邱孟載俱未及也
田按孝陵嚴切海叟以權譎免幸矣大雅集錄海叟
蚊詩云羣蛇戢戢方門爭蝦蟇蝓相和鳴百足之
蟲行無聲毒氣著人昏不醒蚊蚋雖微亦縱橫隱然
如雷吁可驚東方日色苦未明老夫閉門不敢行蓋
元季傷亂之作何元朗四友齋叢說引為譏切太祖
亦附會之過也海叟詩骨格老蒼摹擬古人無不逼
肖亦當時一作家何大復標為明初詩人之冠過為
溢美宜諸公之不取也

下直懷北山隱者

載筆侍雲陞向夕始餘閒撫彼清泠觴慰此憂戚顏出軒月
纔皓臨街露已繁廣庭行且止修檻去復攀幽樹靄深翠餘

花發微殷俯仰不知夕星漢忽西還歸來空房卧嚴城漏欲
殘鴉鳴九井動劍佩亦珊珊將隨夔龍後祇肅謁重關緬懷
息心侶遺世在雲山焉能從之去逍遙巖桂間

遊西墅

吳王逐獸地土衡聞鶴亭古人不可見荒原今獨行遺堵儼
若存阡陌復縱橫依稀望極浦迢遞盼春城江樹旣晦靄原
花復晶熒長煙覆漁屋白水亂鳬汀山川豈云異人事有消
停卽此傷往時聊復樂其生寄言後來士此理可自明

池上 二首

秋池行樂去池樹色已暝露下夕衣涼月上風簾靜饑禽墮
疏竹鳴蛩出深井夜久人事息蕭然諸念屏

振衣書齋客逍遙池上步林隈薄霧起石隙幽泉度鷗迷夕
樹返魚觸秋荷去清聲水上來欲去更延伫

偕友人早出郊

離羣寡游豫得朋殊繾綣相將度春水散漫入芳甸班荆煙
乍斂摘花露猶泣林鶯坐未出沙鳥飛還見遙山浮空翠晴
雲曳輕練一聽野人言復起滄洲願

觀朱澤民所畫山水有感

朱公畫圖愛者衆聲價端如古人重王卿鉅公數見尋往往
閉門稱腕痛我時挾冊遊郡城朱公愛我詩律精時時沽酒
留我宿共聽西窗風雨聲清晨起來忘洗盥短衣飄蕭臨几
案大行中條眼底生岩岫冥冥氣淩亂禹鑿龍門疏洛水根

入黃河源不斷南及衡陽抵桂林東入會稽連海岸是中寘
我一畝宮正如浮萍在江漢溪流浣浣石齒齒夾岸桃花途
遠邇原頭煙霧散雞犬屋裡詩書雜童穉扁舟遠來知是誰
豈是昔日鴟夷皮五湖蝦菜殊可樂千古功名何足奇只今
四十有三載公竟不歸畫圖在世間好手豈易得終日紛紛
勞五彩感時念舊心獨苦況我頭顱白如許呼兒捲卻不忍
看白髮高堂淚如雨

贈張鳴善

白帝城中客清秋碧海旁乾坤方洶洶身世獨遑遑萬里空
形影全家墮虎狼悲歌三百首一一斷人腸

春日偶書

罷官御史府屏迹五湖東江水供漁釣山花費酒筒野情方
浩蕩高論入虛空明日春田事還尋荷篠翁

江上早秋

靡靡菰蒲已滿陂菱花菱葉共參差卽從景物看身世卻怪
飄零枉歲時得食野鳬爭去遠避風江鶴獨歸遲干戈此日
連秋色頭白尤多宋玉悲

南村

南村煙樹接蒹葭白鷺翩翩滿白沙此地遂成茆屋計何人
更識老夫家卽開斷壘行新竹便接平皋樹雜花戎馬紛紛
終未已此身泛泛獨長嗟

寓所

草閣閒庭春水邊
雨蒲風柳自紛然
隣翁對客還爭席
水鳥依人欲上船
西北朝廷無使節
東南城郭自烽煙
老夫避地非遊說
正少蘇家二頃田

次楊廉夫先輩韻

吹笛春江煙霧稀
幽芳小草總相依
巫峽寧知雲雨夢
滄州欲拭芰荷衣
花間鸛鶴迎人起
波上魚龍挾棹飛
不似南州庾開府
鄉關頭白苦思歸

白燕

故國飄零事已非
舊時王謝見應稀
月明漢水初無影
雪滿梁園尚未歸
柳絮池塘香入夢
梨花庭院冷侵衣
趙家姊妹多相見
向昭陽殿裏飛

楊儀驪珠雜錄常熟時大本賦白燕詩云春社年年
帶雪歸海棠庭院月爭輝珠簾十二中間捲玉剪一
雙高下飛天下公侯誇紫領國中傳侶尙鳥衣江湖
多少閒鷗鷺宜與同盟伴釣磯錄呈楊鐵崖鐵崖亟
稱珠簾玉剪之句袁景文在坐曰詩雖佳未盡體物
之妙廉夫不以爲然景文歸作詩翌日呈之鐵崖擊
節歎賞連書數紙盡散坐客一時呼爲袁白燕以此
得名

靜志居詩話海叟居松江府治東門外崇禎末單麻
城恂卽其址構白燕菴李舍人待問書聯於柱云春
風燕子依然入東海鰻魚不可尋相傳孝陵有言東
海走卻大鰻魚何處尋得爲海叟而發也

王士禎漁洋詩話松江有白燕菴海叟故居也康熙
丙戌門人周策銘寫其遺集相寄余感而題之云鼎
足高楊爾不慙百年遺蹟改名藍鳥衣王謝俱零落
七字風流白燕菴

京師歸至丹陽逢侯生大醉

白下西風吹夜涼五湖秋草著微霜千家砧杵初淩亂獨客
關山正渺茫歸去定應殘臘盡飄零猶幸此身強丹陽郭裏

盈樽酒且爲侯芭發醉狂

懷曾彥魯

不見曾公白髮侵酒杯
碁局最關心年華冉冉情何限
江海悠悠水正深
欲買小舟隨雁去便從幽壑聽龍吟
聞其恆往來龍井
明年春滿長洲苑拄杖穿花處處尋

題吳王內涼圖

微月斜侵響屨廊芙蓉清氣滿金塘
鴛鴦只傍闌干宿也愛君王
水殿涼

日莫卽事

茅屋秋來破不勝野雲沙樹自層層
老夫生理今拋廢日日江潭去採菱

江上寄書

湖南估客發西津
東入姑蘇花正春
獨有相思數行字
欲從江海問情人

贈歌舞女童

漳河女子薦良童
名在先朝樂部中
記得教坊新隊子
江北舞春風

瓜步夜泊

千里長江雨乍晴
江頭燈火夜深明
爲報高樓莫吹笛
故園東望不勝情

蘇伯衡
七首

伯衡字平仲金華人
明初爲國子學錄
遷學正被薦

擢翰林編修辭歸洪武十年學士宋濂薦以自代復以疾辭後爲處州教授坐表箋誤下吏死有平仲集

十六卷

田按平仲以古文鳴宋景濂送平仲還鄉序云平仲
辭章體裁嚴比姿態橫逸如春陽被物或根或莖或
卉或條或葉或大或圓或偏各隨其物而暢之無有
同者又云司馬溫國公光資治通鑑成一家言宋之
後元承之宋有李燾雖嘗著爲編年異同之論皆並
存之蓋不敢當作者之任元史新修十四朝之行事
亦頗粲然可觀有能蒐纂以續司馬之書者將不在
今日乎平仲學術富而辭章美其東還也將操筆削
而成百代不刊之典其爲老輩推重如此平仲之官
學錄也在丙午七月吳元年丁未進學正見所作國
子學同官記其被薦在洪武元年庚戌集中有庚戌
七月九日晡時御筆宣喚詩云元霜溼霧動龍香水
殿書題愛晚涼蟻虱小臣惟感愧姓名衣被五雲章
明日入見奉天門口號云玉階俯伏聆天語金匱抽
書亦許陪又明日詣相府控辭述懷云只緣多病兼
無似只合山林送此生蓋引見後授編修卽以病辭

也其官國子前後五年胡仲子跋平仲集云平仲居
太學六年提要疑爲史誤余詳檢本集蓋仲子誤加
一年史不誤也集中又有被留校讎元史史館雜書
詩云筆削自從尼父後文章無過馬遷優坐銷官燭
知無補絲絡翻慙進庶羞蓋辭官後又被留史館至
明年始得還也平仲夙懷恬退連雨雜書詩云決去
胡不早無營尙盤桓東齋夕書詩云偶隨孤鶴行時
見疎螢度卽此有餘歡何況山中去厥後景濂薦以
自代力辭還山二十一年聘主會試後辭還尋授處
州教授以表箋忤旨下獄死二子恬怡救父並被刑
覆巢之下安有完卵其爲斯人言哉平仲集十六卷
詩僅一卷非其所措意而澤古旣深風格亦自騫舉
其他著述無聞集本近亦罕見余假之江陰繆氏雲
在龕

送宋起居還金華

長揖謝宦徒還歸戒征軸眷言幽貞廬負在仙華麓就養望
旣盈考槃願亦足儲清濬昔池雍荒理舊竹蘭佩紐春蕤荷
衣製秋綠沆瀣晨三嚙彫胡晝九曝從今猿與鶴不復怨幽

獨

連雨雜書

江雨殊未已江風生早寒今我悄不樂喟然起長歎決去苦不早無營尙盤桓徒貽父母愁歲晏衣裳單

東齋夕書

幽居得自怡野性方愜素高枕一酣眠長廊獨閑步白日誰云長青山忽已暮皓月照前階涼風滿高樹偶隨孤鶴行時見疏螢度卽此有餘歡何況山中去

贈徐季子

百金不惜市梃鞭兩耳不解聽朱絃人情如此亦何以我每見之獨慨然夫君懷寶起浙右掉鞅觀光來日邊夙學人言

破萬卷新製我喜窺幾編金莖玉露足秋爽林花澗草爭春
妍紛紛牛毛豈不多振振麟角爾固專摘藻詞垣翻舍置採
芹鄉泮仍留連所好者竿鼓者瑟猶柄以方鑿以圓陳平丰
姿若冠玉酈生辯口如河懸禮意殷勤日三接華貫敷歷歲
九遷由來利鈍係遭遇未必愚智殊天淵樂育菁莪亦已重
况乃桑梓敢不虔去國不賦北平什還家徑上東吳船大材
小試吾竊歎冷官不厭子乃賢簪予閱世倏四十守官太學
垂五年包羞待問成倚席畢景兀坐寒無氈勲業空期螳附
驥俛仰卻笑夔憐蚘彼哉浮榮勿復道歸歟樂事言難宣會
稽雲門最幽絕鑑湖剡水交漪漣玄猿嘯呼山近屋白鳥明
滅江吞天雲閒往往得靈藥月下時時聞采蓮多暇應爲曲

水會乘閒便作東山眠村翁溪友總愛客
蕨芽蓴菜不計錢
酒酣更斫銀絲鱸章就還灑蟬翼牋並遊
只許鐵冠子同載
應懷玉局仙願言留榻以相待一曲擬乞
君王前

贈王彥和檢校還北平四首

錄二

拜表趨丹闕承恩宴紫宸羽儀江左彥簪紱幕中賓
玉液金盃出璫筵錦瑟陳轅門思贊佐迴轡敢逡巡
乘傳歷長途齊封接魯墟頻年經戰鬥幾處遂耕鋤
小市尊多酒貧家飯有魚重來朝覲日爲報玉階除

田按彥和名錡處州人與兄鍾一母同乳而生鍾字
彥中早卒劉伯溫爲文以哀之彥和與修元史附見
明史趙璘傳史不詳其仕履余錄高季迪贈彥和赴
檢校北平詩僅詳其授職耳今錄平仲詩復檢平仲
文集有送王彥和序云彥和儀觀甚偉於書無所不
讀弱冠偕其兄彥中試於鄉不中卽棄去作爲古歌

詩雜文長老咸推讓焉今春以議禮被徵而起尋承
詔入史局纂修元史比史成北平之命下高君季迪
率朝之搢紳賦詩以華其行而余序其簡首彥和爲
宋給事中信之後家有槐堂劉伯溫爲之賦詩云晉
公庭上三槐樹千載流傳是德符今日耳孫思繼述
昔年手澤歎荒蕪當窗欲看屯雲葉夾徑先裁待雨
株會見枝頭金粟蕊秋風吹送上天衢余於前後史
局諸公無詩可採者必詳其事蹟平仲又有夏尙之
太史哀辭序云我師克燕拔其知名士赴南京太史
夏君以老病乞歸會遣使分道搜訪元史乃強君如
江廣君辭不得命乃行行至番禺以疾卒君名以忠
字尙之袁州人據此則夏君又續修庚申君史分道
採訪十二人之一人矣

送蔡思賢參政使蜀

清晨旌節三川去今日車書萬里同燕餞都亭來詔使停驂
鄉井訪鄰翁峯經迴雁邊聲靜峽入嘯猿樹影空昭烈祠西
諸葛廟秦州城北隗囂宮神交露立蒼茫際長嘯風生感慨